

# Novas structurass per il sectur d'asil

## Reducir il temp dal proceder

DA LUCAS DEPLAZES / ANR

■ **Cun novs centers da la confederaziun per requirents d'asil vul il cussegl federal examinar las dumondas e decider surlonder per la pli gronda part entaifer 140 dis.** En diversas conferenzas tranter la confederaziun, ils chantuns e las vischnancas han

ils spezialists per las dumondas d'asil examinà la situaziun e formulà novas propostas. L'atun passà ha il cussegl federal sutta mess al parlament sia missiva per la revisiun da la lescha d'asil. Finamira da la revisiun è d'accelerar la procedura d'examinar las dumondas d'asil. Cun ina nova structura per il sectur d'asil vul il cussegl federal garantir in proceder gist e pli svelt. En sis regiuns da la Svizra vul construir la confederaziun agens centers per requirents d'asil che disponan da las cundiziuns necessarias per accelerar la procedura, sco represchentants legals, interprets e cussegliaders da dretg. Las novas structurass duessan lubir da tractar las singulas dumondas d'asil – per la pli gronda part – en var 140 dis. Ston dentant ulteriuras dumondas vegnir examinadas pli fundà, vegnan repartids ils requirents d'asil sin ils chantuns. En tals cas duess la procedura vegnir terminada en il decurs d'in onn. En cas d'ina decisiun negativa ston ils pertutgads bandunar immediat la Svizra. Per l'execuziun da la lescha portan ils chantuns la responsa-

bladad. Per garantir ina procedura gista e correcta metta la confederaziun a disposiziun als requirents d'asil ina cussegliaziun giuridica gratuita. Quest sustegn giuridic gratuit duai reducir las dumondas da recurs e procurar per ina dimora pli curta en Svizra.

### Novas investiziuns

La confederaziun vul pudair metter a disposiziun en ils novs centers var 5000 plazs da domicil per requirents d'asil. Quai munta investiziuns da passa ina messa milliarda francs che duain dentant lubir da spargnar var 170 milliuns francs l'onn. Ils centers da la confederaziun duain vegnir fixads en collavuraziun cun ils chantuns e cun las vischnancas.

Sco emprima chombra ha il cussegl dals chantuns deliberà la fatschenta. La pledadra da la cumissiun *Verena Diener Lenz* (verds/ZH) ha fatg allusiu a las mesiras urgentas realisadas l'onn 2012 ch'il pievel ha acceptà cun ina maiortad da 78%. Sin fundament da quellas mesiras èn vegnidas fatgas emprimas experientschas a Turitg. Cun la missiva dals 3 da settember 2014 propona il cussegl federal ina nova structura per l'entir sectur d'asil. Diener fa attent als problems difficils da repatriament dals requirents d'asil che han retschet ina decisiun negativa. A chantuns che na fan betg lur obligaziun areguard il repatriament po la confe-

deraziun metter a quint ils custs supplementars. Requirents d'asil renitents pon vegnir mess en centers spezialss cun mesiras da libertads limitadas. Cun sis vuschs cunter duas ed ina abstenziun recumonda la cumissiun da suandar la via dal cussegl federal.


### Meglierar l'acceptanza tar la populaziun

*Stefan Engler* (pcd/GR) ha dilucidà l'actuala problematica al sid da l'Europa e fatg attent che la Svizra stoppia quintar durant ils proxims onns cun in augment da requirents d'asil. L'onn passà han 23 765 persunas inoltrà ina dumonda d'asil. Quest onn quintan ins cun var 30 000 dumondas d'asil. Tenor Engler èsi central per l'acceptanza da la populaziun che persunas cun ina decisiun negativa vegnian repatriadas consequentamain. Maldiever da nossas instituziuns sto vegnir sancziunà. Da nov è cumpetenta la confederaziun per las lubientschas da construcziun per novs centers.

Plinavant duai il cussegl federal sustegnair il concept da l'Uniu europeica (EU) che prova da reparter pli gistamain ils requirents d'asil che vegnan en l'Europa. Per Engler èsi impurtant da sa gidar cun ils pajais d'origin dals requirents d'asil. En ses votum fa el attent als giuvenils che vegnan persuls en Svizra. Quels dovrian dapli tgira ed atenziun.

La presidenta da la confederaziun, *Simonetta Sommaruga*, è persuadida ch'ils problems d'asil pon vegnir schliads mo ensemen cun ils chantuns e cun las vischnancas. Ella fa attent che las emprimas experientschas en il center da prova sajan positivas. Var 60% da las dumondas d'asil pon vegnir liquidadas en ils centers da la confederaziun, grazia er al sustegn giuridic gratuit. Ils recurs sajan sa sbassads per la mesadad. Bunas experientschas han ins fatg cun la «procedura 48 uras» per persunas che vegnan or da pajais «segirs». Quellas dumondas èn sa reducidas considerablmain, ha constatà Sommaruga.

Cun 35 cunter trais vuschs e tschintg abstenziuns ha acceptà il cussegl dals chantuns las propostas dal cussegl federal. La fatschenta va uss al cussegl naziunal.



**En sis regiuns da la Svizra vul la confederaziun construir agens centers per requirents d'asil che disponan da las cundiziuns necessarias per accelerar la procedura, sco represchentants legals, interprets e cussegliaders da dretg. Las novas structurass duessan lubir da tractar las singulas dumondas d'asil – per la pli gronda part – en var 140 dis.**

KEYSTONE